

An Lucsambuirgis

Ón Vicipéid, an chiclipéid shaor.

Is í an **Lucsambuirgis** an teanga is mó a labhraítear i Lucsburg, agus í ó dhúchas ag trí chéad míle duine. Go bunúsach, níl ann ach canúint Meán-Ghearmáinise, agus í an-ghaolmhar leis na canúintí Meán-Ghearmáinise eile, cosúil le caint na ndaoine i gKöln, mar shampla.

Níl an Lucsambuirgis ina teanga oifigiúil sa tír ach ón mbliain 1984 i leith. Tá litriú ar leith aici ón mbliain 1946 anuas, ach rinneadh leasuithe air sa bhliain 1999. Baintear úsáid ócáidfhreastalach aisti sna scoileanna le rudaí deacra a mhíniú sa chaint, ach is iad an Ghearmáinis agus an Fhraincis na teangacha scríofa a chleachtar. Bíonn an Lucsambuirgis le cloisteáil ar an raidió agus ar an teilifís go minic, ach ní bhaintear mórán úsáide aisti sna clómheáin, cosúil leis na nuachtáin agus na leabhair. Is í an Fhraincis teanga an dlí agus na reachtaíochta i Lucsburg, agus ní thagann leabhar na reacht i gcló in aon teanga eile, cé go bpléann parlaimint Lucsburg na dlíthe nua trí mheán na Lucsambuirgise. Ní teanga oifigiúil í an Lucsambuirgis san Aontas Eorpach ach an oiread, agus ní chuirtear aistriúchán oifigiúil Lucsambuirgise den reachtaíocht Eorpach ar fáil do na saoránaigh - glactar leis mar phrionsabal go bhfuil an Fhraincis ag cách.

Tá saol poiblí Lucsburg dírithe ar dhaoine a bhfuil an trí theanga acu idir Lucsambuirgis, Ghearmáinis agus Fhraincis. Is í an Fhraincis teanga na bhfógraí poiblí, ach is í an Ghearmáinis is mó a úsáidtear sna nuachtáin. Má thagraíonn nuachtán d'fhocail a labhair polaiteoir, státseirbhíseach nó boc mór éigin eile as Lucsambuirgis nó Fraincis, is sa teanga sin a thabharfar na focail, agus má thráchtar ar an reachtaíocht, ní thabharfar an tagairt ach as Fraincis. Deirtear go bhfuil tríbhéascna (*triglossia*) i bhfeidhm sa tír.

Cé gur canúint de chuid na Gearmáinise í an Lucsambuirgis, tá sí á forbairt ina teanga chaighdeánaithe ar leith, agus is é dearcadh mhuintir Lucsburg gur siombail lárnach dá bhféiniúlacht náisiúnta í. Go háirithe le linn an Dara Cogadh Domhanda, nuair a bhí Lucsburg forghafa ag na Naitsithe, theastaigh ó mhuintir na tíre tabhairt le fios nach raibh siad ina nGearmánaigh, más ionann a bheith i do Ghearmánach agus a bheith i do Naitsí.

Ba é Michel Rodange (1827-1876) a chuir tús le litríocht na Lucsambuirgise, agus is dócha gurb é Josy Braun (a rugadh sa bhliain 1938) an scríbhneoir comhaimseartha is tábhachtaí. Sa bhliain 1997, d'fhoilsigh Braun an chéad úrscéal bleachtaireachta sa teanga.

An Cupla Focal as Lucsambuirgis

Lucsambuirgis (Lëtzebuergesch)	
Á labhairt:	Lucsburg, An Bheilg, An Fhrainc, An Ghearmáin
Réigiún:	An Eoraip
Cainteoirí san Iomlán:	300,000
Rang:	~
Líne ghinealaigh:	Ind-Eorpais <div>Gearmáinic</div> <div>Gearmáinic an Iarthair</div> <div>Ard-Ghearmáinis</div> <div>Gearmáinis an Láir-Iarthair</div> <div>Lucsambuirgis</div>
Stádas Oifigiúil	
Teanga Oifigiúil:	Lucsburg
Foras Pleanála Teanga:	Conseil Permanent de la Langue Luxembourgeoise (CPLL)
Cóid teangeolaíocha	
ISO 639-1	lb
ISO 639-2	ltz
ISO 639-3	ltz (http://www.sil.org/iso639-3/documentation.asp?id=ltz)
Amharc ar: Teanga – Liosta Teangacha	

- *Jo* - Sea/Tá
- *Neen* - Ní/Níl
- *Wëllkomm!* - Fáilte!
- *Wéi geet ët?* - Conas atá tú? Cad é mar atá tú? Cén chaoi a bhfuil tú?
- *Ech heesche ...* - ...is ainm dom
- *Entschellegt!* - Gabh mo leithscéal.
- *Zwee béier, wann ech glieft* - Dhá phionta, más é do thoil é
- *Kënnt Dir mir de wech zëm weisen?* - An feidir leat a rá liom, cá bhfuil an ...?
- *Villmols merci* - Go raibh míle maith agat
- *Äddi* - Slán



Is síol é an t-alt seo. Cuir leis (https://ga.wikipedia.org/w/index.php?title=An_Lucsambuirgis&action=edit), chun cuidiú leis an Vicipéid. Má tá alt níos forbartha le fáil i dteanga eile, is féidir leat aistriúchán Gaeilge a dhéanamh.

Aisghafa ó "https://ga.wikipedia.org/w/index.php?title=An_Lucsambuirgis&oldid=749274"

Tugadh an leathanach seo cothrom le dáta an 30 Nollaig 2014 ag 15:49.

Tá an téacs ar fáil faoi réir an [Creative Commons Attribution/Share-Alike License](#); féadann téarmaí eile a bheith i bhfeidhm sa bhreis. Féach ar [Téarmaí Úsáide](#) le sonraí a fháil.

Trádmharc cláraithe is ea [Wikipedia®](#) de chuid [Wikimedia Foundation, Inc.](#), eagraíocht neamhbhrabúis.